



Tir Yimym

www.tiryimym.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimym@gmail.com

TAPAK 7

Yangia anidakangma :



Tir Yimym



tir_yimym



tir yimym

TAPAK 8

Trump-i Iran sanctions shidak inyaktsü ajungshi

All-rounder Ravindra Jadeja-i otsü tasen ka yangluogo

VOL. XXII ISSUE NO. 210 (ADOK 210)

DIMAPUR

YANGTEPNÜ (THURSDAY)

MONUPII (MAY) 15, 2025

₹ 5.00

NJCF-i Naga plebiscite atema tenüngsang agütsür

Dimapur, May 14, 2025 (TYO): Nagaland Joint Christian Forum (NJCF)-i May 16, 2025 nü otsütsü plebiscite atema Naga nung tenüngsang agütsüba den iba sentong ayonger dang pelaba metetdaksüogo.

Naga putiotsü ya khenyongi balaka lir aser tongtipang alizüng asem densema lir. Iba nung kaji Simon Commission dangi 1929 memorandum züluba aser iba nung Naga nung sobaliba, inyaksangshi aser tamangba yimsü khenyongi balaka ta asüba nenshia India den madentsü shia liasü ta NJCF-i ashi.

Tanabubaji Indian Independence Day matongdang anogo ka jelia August 14, 1947 nü Naga Independence Day sangdongba lir ta parnokisa ashi.

1951 plebiscite nung Naga nung 99.99% tashi asenok shinga kübok masü ta kuli agüja liasü ta NJCF-isa metetdaksü.

"Asenoki 1951 plebiscite sülen küm 75 ajungba bilemteta amungdang, iba sentong nung adener ajak temoatsü angutsü aser district, kin, aser yimtsüng jenjang ajak nung maneni olemtepa aotsü imlar. Tsüngremi maneni len aniangma" ta NJCF-i sa ashi.

China-i Arunachal nung tenüng melenba magizüker

Guwahati, May 14, 2025 (Agencies): China-i tawa Arunachal Pradesh nung tesem kar nüngja melenshitsu merangba magizüker ta India-i metetdaksü. Iba mapa ya nüngdak mali aser Arunachal Pradesh ya India nung tongtipang shilem ka lir ta Centre-i ashi.

Beijing-i Arunachal Pradesh nung tesem kar nem Chinese

tenüngtem jaloktsüba list ka sayaa liasü. Parnoki Arunachal Pradesh ya southern Tibet nung shilem ka ta züngshir.

"China-i Indian state Arunachal Pradesh nung tenüng melenshitsu merangba aiben ajurua arur. Iba inyakyim onoki magizüker" ta Ministry of External Affairs spokesperson Randhir Jaiswal-i ashi.

Nagaland Cabinet-i ILP maparen akangshinür

Kohima, May 14, 2025 (TYO): Nagaland state Cabinet-i Bodbarnü Inner Line Permit (ILP) system mapa inyaktsü aser akangshitsü atema jembitepogo.

"Ozüng alema nisung aika aruba tebilemtsü khuret loktettsü atema ILP maparen tenzüktsü kanga nüngdaka kümogo" ta Government Spokesperson aser Minister K. G. Kenye-i ashi.

Cabinet-i ILP framework nung inyaksangshi timtem alibatem aser Manipur o Arunachal Pradesh nung takok ngua inyakba aser ILP systems digitalized asüba indang benoka lemsatep.

"Onoki ILP atema jembia arur saka mapang kar nung mapa shitak meinyak aser iba ajanga illegal Bangladeshi immigrants aika arudaktsü" ta Kenye-i ashi.

2019 legislative temelenshi asüba aser talisa Citizenship Amendment Act (CAA) kübok

Section 6B enoksemba ajanga state temi Bengal Eastern Frontier Regulation Act of 1873 kübok ILP provisions dendaktsütsü temelaba agütsür ta pai ashi.

"Iba ajanga legal framework ka lapoktsü saka maparen nung timtem aliba ajanga Nagaland nung ILP mapa sadoksadoka meinyakteter" ta Minister Kenye-isa shisem.

Public-i ILP mapa inyadkatsünüba angateta lir saka locals, tourists, migrant workers, aser indigenous minorities ta telemsa ayutsüba nung timtem ajurur. Sorkari chichiba lisopurtem tangar den balaka jangjatsü atema mapa inyaker ta pai metetdaksü.

ILP maparen tiptema inyaktsü atema Cabinet-i department balala dena Enforcement Directorate ka amenoktsü tebilemba shidangogo. Mapa tasen kar madoki dang iba Enforcement Directorate ajanga ILP maparen

inyaktsü aser parnoki police aser administrative department tem den amalitepa inyaktsü.

"Kidanger state tem nungbo ILP ya computerized süogo aser iba nung expiry trackers aser centralized alerts dena lir. Asenoki parnok dang nungi angazüktsüla aser asenok system ka tenzüktsüla. Online payments aser real-time tracking ajanga tim masüba azüoktsü aser mapa tajungba inyaktsü" ta Kenye-i ashi.

Kidanger state tem nung ILP maparen inyakba asadangtsü aser inyakyim ajizüktsü atema Subcommittee ka tenteta mapa nüngloktüsügo. Külen Cabinet-isa özüng amertem dang mita aotsü aser ILP mapa tenzüktsü tetuyuba agütsüogo.

"ILP agütsüba aser mapang shitak nung parnok aotsüba dena kanga tongtipang. Iba atema asenoki solid tracking mechanism ka nüngdaker" ta pai ashi.

NSCN-IM-i Kuki nung dang timtem magütsütsü metetdaksür

Imphal, May 14, 2025 (Agencies): National Socialist Council of Nagaland (NSCN-IM)-i Ukhrul district, Manipur nung May 20 nungi 24, 2025 tashi Shirui Lily Festival amungtsü aliba pelashishia agizükba metetdaksüogo.

NSCN (IM)-i Bodbarnü sangdong ka nung iba benjung amungtsü atema pelaba den parnoki eastern region nung environmental awareness aser sustainable tourism ajungkettsü merangba shia lir.

Shirui Lily Festival mapang tourism nung meimprong mesüra kin kar dak tenük yoka mapa tamajung inyakra metoktsütsü ta NSCN (IM)-isa ashi.

Shirui Lily Festival ya Manipur

state flower nüngtem nung amunger aser iba benjung ajanga environmental conservation osang prokshir. Maneni, iba benjung ajanga Tangkhul Naga aser tanga Naga kintem sobaliba senmang benjunger.

Kuki Zo Village Volunteers-Eastern Zone (KZVV-EZ)-i Meitei nung dang Kuki nung lushi nung tetsüng majemoktsü tenokdangba agütsüba sülen NSCN(IM)-i iba osang metetdaksüogo.

KZVV-EZ-i Meitei nung dang Shirui Lily Festival nung adeni aodang parnok lushi adena mesüitsü tetuyuba agütsü. Imphal nungi Ukhrul tashi lenmang nung Kuki nung yimtsüng kar lir.

KZVV-EZ-i tetuyuba agütsüba ya NSCN (IM) jazükba ama lir aser print mesüra social media nung iba mesükba sangdong agütsüra ibaji NSCN aser Northeast nung Naga kintem anema agütsüba ama züngshitsu ta metetdaksüogo.

Ukhrul district nung Kuki nung aliba tesem ya "Kukiland" meyong ta KZVV-EZ-i ashiba magizüker ta NSCN (IM)-isa ashi.

"KZVV-EZ-i kin kar dak tenük yoka tourist tem Ukhrul mesüra Shirui village-i aruba noktangba magizüktsü. Kukiland ta asüba telongtet nung Ukhrul region kübok Naga lushi inch ka danga densema mali" ta NSCN (IM)-isa metetdaksü.

Census data sülen reservation policy meyipa repringshitsü

Kohima, May 14, 2025 (TYO): Nagaland nung nütsüng yongsük tejangja memetet tashi job reservation policy meyipa repringshitsü makok kechiyong iba mapa ya national census figures nung ajemdaker inyaktsüla ta Nagaland government spokesperson aser Minister K. G. Kenye-i ashi.

Kin kari reservation system meyipa asadangtsü akhangba atema Kenye-i "asenoki odangbo inyaka moutettsü. Tamendakdak ka nüngdaker aser ibaji census lir" ta ashi.

"Asen census atema ken o benokogo. Kin teloktemi High Court tsüngdang benok aser tang iba ken o Supreme Court tongogo. Census küm-2001 mesüra 2011 atema mangatettep adoka lir. Asenoki 2021 ajangogo

aser tang atemabo 2021 ya asütsüla saka 2011 anema ken o benoka lir" ta paisa metetdaksü.

"State sorkari bangzüng ka merenem tashi ataa alitsün lemtetogo. Census data tasen mangu tashi mapa meinyaki atatsü aser data anguba sülen ang item tebilemtsü atema inyaka aotsü" ta Minister Kenye-isa metetdaksü.

Census agütsüba ya state sorkar masü saka Centre dak dang tashi lir. Centre-i temelaba magütsü tashi asenok sasa census agütsü makok. Iba ya linük ajungalen agiba inyakyim ka lir ta paisa ashi.

Bangladesh nung mapa nungi sodi ngur alilba ketdangsür kati North East atsünga agütsü jembibaji temenünütsüka lir ta Kenye-i ashi.


India-i Pakistan den

mangatettep adoka aliba aser külen retired Bangladeshi military ketdangsür kati iba ama jembiba atema Nagaland renema lir asü masü ta osangbeneri asüngdangdang "Nagaland-i national defence forces den külemi noktaka lir" ta pai langzü.

"Taoba Bangladesh Army General-i jembiba ya temenünütsüka lir" ta pai ashi.

"1971 Bangladesh Liberation War mapang northeastern forces-i India den yaritep. Asen state police forces-i Pakistan nung sepaitem adena ai aser iba ajanga Indian Army nem Bangladesh nüjiso ngudaktsütsü lenmang lapoktsü" ta Kenye-i ashi.

"Yangi armed forces peria dang lir aser rara adokra Bangladesh linük atsünga agütsü koka lir" ta paisa shisem.



Mokokchung nung MAS training agi



Chief Medical Officer, Mokokchung indang Conference Hall nung MAS training agidang tangokba noksa ka nung Dr. Takosunep Dy. CMO, Mokokchung den shisalen sayur aser shilem agirtem angur.

Dimapur, Monupii/May 14 (TYO): NUHM kübok Mahila Arogya Samiti (MAS) training ka May 13 & 14, 2025 anogotem Chief Medical Officer, Mokokchung indang Conference Hall nung agia liasü.

Iba training tenzüka sentong tatsüka agidang Dr. Takosunep, Deputy Chief Medical Officer, Mokokchung ajanga MAS züngsem temi health services asoshi yaritepba atema pelaba

lemsatepa liasü.

Paisa MAS züngsemtem dang maneni nüburtem asoshi inyaksü ayongzüka liasü.

Sentirenla Longchar, Consultant (NUHM) ajanga health-planing, implementing aser monitoring health programme tem nung nüburtem shilem agidaksütsü asoshi MAS ya nüngdaker ta ashi.

Laisa record junga anepalua ayutsü, ketdang asütsü aser united fund atema accounting tongtipang lir ta ashi.

Iba mapang Watisenla Jamir DCM ajanga MAS züngsemtem teinyaksü tongtipang lemsatepa liasü.

Imnasenla Imchen GNM, UPHC Yimyu ajanga MAS züngsemtem ya health tsütsü inyakyim balala nung training agütsü aser health care services nung nübur tenzüksü nüngdakba aser nüburtemi yaritepba indang angazükdakja liasü.

Iba training nung MAS züngsem 45 dena liasü.

Assam Rifles-i Solar Street lights lema agütsü

Dimapur, Monupii/May 14 (TYO): Renewable energy resources temaba jenjangi ajungkettsü nükjidong nung Assam Rifles temi Sunbird Trust den lungjemer Mon district kübok Tanhai, Totak Chingnyu aser Longmein yimtsüngtem aser Tuensang district kübok Chungotore, FIC (Angangba

aser Sangsomong yimtsüngtem nung Solar Street lights 56 lema agüja liasü.

Assam Rifles aser Sunbird Trust lungjemer item yimtsüngtem semdanga Solar Street lights ya lema agütsü aser yimdaklirtem dang itemji inoktsü, anepalutsü aser amshitsü yimyatem sayua liasü.

Iba maparen yagi nüburtem asoshi temelenshi tajung bener arutsütsü.

Item solar lights yagi item yimtsüngtem nung alir nisung 3809 shi ajangzüksü aser eco-friendly tesangwa agitsü. Assam Rifles aser Sunbird Trust ajanga mapa tajung inyakba nüburtemi pela agizüka liasü.

Mokokchung district nung JICA Mission asadanga liasü



JICA India nungi ketdangsürtemi May 13-14, 2025 anogotem Mokokchung district kübok yimtsüng balala nung NFMP-JICA Project balala inyakyim semdangba mapang tangokba noksa nung angur.

Dimapur, Monupii/May 14 (TYO): NFMP-JICA Project inyakba ajanga temelenshi tajung bener aruja ecosystem tesamar aliba asendenshidaksü, yimdak yimtsüng nung alirtem takum libaliru jenjang tajungba kumdaksü aser yimtsüng nung ki o jen tashi itshidaksü.

JFMCs, SHGs aser sorkar department balala lungjemer inyakba ajanga arem min ketdangsüba nung tashi tait aser tejangja shilem agiba lir.

Mid-term review nung shilem ka ama JICA India nungi ketdangsürtem - Ishikawa Saya, Representative, aser Sushma Sen Adarshi, Development Specialist - ajanga May 13-14, 2025 anogotem Mokokchung Division semdanga liasü.

Parnok meina Temjenyapang, IFS, Chief

Conservator of Forests (NFMP, Project Director), Rongsenlemla, IFS, Conservator of Forests (NTC), aser Pravanjan Mohapatra, Team leader lenisüba kübok Project consultants tem arua liasü.

May 13, 2025 nü tesemdanger tem ya Merangkong yimdak agizük aser Merangkong JFMC tiri iba project kübok maparen balala inyakba indang tongmelang agi lemsatepa liasü aser Merangkong nung aliba SHGs temi tang teinyakdak mapa aser takok anguba, talisa IGA (Income generating activities) balala aser skill development maparen sayua liasü.

Parnoki SHGs aser JFMCs züngsemtem den sensaksem tajung agia parnoki mapa tajung inyakba asoshi tenügsang

agütsü aser maneni mapa tajungtiba nung inyaksü ajungshia liasü.

May 14 nü JICA team ya Aliba yimdaki ao aser NFMP project (JICA Assisted Project) kübok inyakba EPA & WHS Convergence semdanga liasü. Yangji nüburtemi NFMP kübok mapa tajung inyakba asoshi tenügsang agütsü0, koba ajanga kibong 100 dak tema tajangzük agir.

JICA team-isa Chungtia yimtsüng semdanga JFMC Nursery, WHS & EPA semdanga yangjia JFMCs & SHGs züngsemtem den sensaksema liasü.

Aliba aser Chungtia nung aliba SHGs ajungai first cycle takok ngua renemer ano business plan tasen tenzüka aliba lemsatepa liasü.

Niuland nung Monsoon Preparednessenden amen

Dimapur, Monupii/May 14 (TYO): Deputy Commissioner & Chairman District Disaster Management Authority, Niuland, Sara S Jamir ajanga May 13, 2025 nü DC Niuland indang Conference Hall nung Monsoon Preparedness indang senden ka ayongzüka amen.

Iba senden nung Sara S Jamir-i jembidang, disaster management ya team work ka lir aser yangji department ajungai tongti shilem agitsüla, ta ashi aser department shia dang disaster management committee tenteta district nung alimar lendong atalokdang damage assessment report yanglutsü ashi.

Laisa Rural Development Department dang yimtsüng ajunga nung kilentsü aoba lenmang müreka ayutsü aser

nüburtem temang mürekmejua aliba indang angatetdaksütsü ajungshia liasü.

Iba senden nung Department of Food & Civil Supply, PWD (R&B), Power Department, H&FW aser PHED ajanga district nung alimar lendong timtem ajurudang yariteptsü renema aliba osang agüja liasü.

Senden amendang Nagaland State Disaster Management Authority (NSDMA) nung nübu agi anünga aliba indanga jembia liasü.

Maneni Nodal Officer incharge for Niuland District (NSDMA), Keren-i alimar lendong balala atalokba mapang NSDMA aser sendaktepa aliba department balala indang shilem aser teinyaksütem tongmelang agi lemsatepa liasü.

Mokokchung DPDBsendenmenogo, Board chairmantasen melen

Dimapur, Monupii/May 14 (TYO): Ita shia amenba Mokokchung District Planning and Development Board (DPDB) cum felicitation aser DPDB Chairman tasenba aser Deputy Commission & vice chairman DPDB, Mokokchung tasenba metetpelaba senden ka May 14, 2025 nü DC Mokokchung indang Conference Hall nung mena liasü.

NLA Speaker & DPDB Chairman menden yutsüsang Sharingain Longkumer-i MLA & Mokokchung DPDB Chairman tasenba Noklutoshi pela agizük aser DPDB züngsemtem dang yaritepba aser amalitep akaba atema pelaba lemsatepa liasü.

MLA & DPDB Chairman Mokokchung, Nuklutoshi-ia DPDB Chairman tejenba dang pa mapang district nung tatishitsü aketba mapa tajung inyakba atema tenügsang agüja liasü.

Nuklutoshi-i district terenlok asoshi tajungtiba inyaksü ta ashi aser züngsem ajunga dang pa mapa tasenba nung amalitep akatsü aser yariteptsü ayongzüka liasü.

District Administration tenüng nung SDO (C) HQ ajanga state nung sardar jurisdiction maliba district ji Mokokchung ya dang lir, koba administration tajungba atema nüngdaker, ta ashi.

Iba atema NLA Speaker Sharingain Longkumer-i tejangja metettsü aser meshidak angatetba nungi jenbutsü asoshi report tejangja ka yanglutsü ayongzüka liasü.

MLA & DPDB Chairman Mokokchung, Nuklutoshi-i tim ketdangsür dang taruba DPDB senden nung report bener arua agütsütsü ashi.

Iba senden nung Mongsanger Semchir Telongjem Society registration agizüka tanüngba mera agitsü atema sorkar dangi yoka liasü.

Kohima nung bike aser gari auyartem apu

Dimapur, Monupii/May 14 (TYO): Bike aoyaba osang ka May 12, 2025 nü North Police Station, Kohima dangi arua liasü. Iba osang nung ajemdaker y Dy. SP (Prob) Sara Tokiu-i anir North PS party ajanga auyar aliba motor bike ya ngutet, ta Kohima Police sangdong ka ajanga ashi.



Itdangiter osang balala amshia parnoki temulung melemteni alisang ya Pherima area nung apu. Iba sülen North PS nung ken o ka benoka lir.

Kasa anogosa Lower Bayavü Colony, Kohima nungi gari ka samaba osang ka arua liasü. Osang angazükli Kohima

Police ajanga units ajunga nem osang agütsü aser mera balala agia iba gari ya Razhü Point area nung ngutet.

Iba sangdong ajanga police team work aser kati ka dak tamang Katepa pei mapa kera inyakba atema tenügsang agütsür, ta sangdong ajangasa ashi.



TIR YIMYIM YIMOBILEM (EDITORIAL)

DIMAPUR THURSDAY, MAY (MONUPII) 15, 2025

Asenoki danga shitak inyaklasang!

Nagaland ya asen lima, anungji junger ta jembiner saka asenok ajak tia majung tanü Nagaland junger ta jembitsüsa kuli aika mangur aser Nagaland junger ta jembir majurur. Aji oda, Nagaland nung government-i yangluba lenmang junger ta jembibabo kanga mangashir aser Nagaland government school aser mozü kitem ajungba indanga kangabo mejembir. Kasaji, Nagaland government office-tem nung mapa inyakterem maruba indang jembir aser Nagaland government-i lemtetba telemtetbatem mapa kuma inyaka maodangyongi agientsüsa akümer. Aji oda, Delhi-ibo Nagaland dang sen kwi nungdakdir agiang ta dang lir, saka Nagaland government-i mapa shitak inyakba kuli kaket mesayutetba ajanga center government nungi sen mengutet timatemer. Ano tamajungtibaji Nagaland government kübok department zünger mezüngma lir aser item ajakji nübortem nungdak inyaksütsü atema akümba department-tem lir, ajisüaka inyakterem ita sen chia alitsü atema kümtetba department-tem amai dang, inyakdi asüyonga mapa teinyaksü kecha mali aser mapa tasen inyakloka aotsüa merajemteter ta kidangmonger külemi sentepa amongdak tenzükba amai department aika lir. Item department-temji karbo mali kuma anentsü nunga state asoshi tajangzük tulu süla aser ano department-tem karbo department ana asem agi ka kuma lokteptsü nungdakba department-tema reprangteter. Item mapa jagi government sen aika kümzüksü aser office nung inyaktertemia mapa nung temulung tagütsüba agüja inyaksü. Aji oda, Nagaland ya kanga ajungtsüba ser nung department shia nem nübortem atema Delhi nungi yokba sentong aser senotsü indang nübortem dang rasaa ahitsü melen, mashi miima ayur aser nüboremi inyaksü melen office nung inyaktertemiang mapaji inyaker. Anungji, aluyimertema office nung inyakterem, yimtaklirtema office nung inyakterem aser town nung alirtema office nung inyakterem ta shitakba teyari angutsü purtembo chiyongtsüa maka timatemer saka office nung inyaktertembo sensaker aser mokokmeinertem asoshi aruba teyaritem ajak agiba agi rongsen agir magima aser chir mechima bendener. Iba jagi Nagaland nung mapang tatsüka tsüngda takartem o sensakterem na tsüngda anüng o ali na amai kümogo. Ibayongji, Nagaland nung mapa inyaker meinyakma adoktsü melen mapa mangu kazür teimba angur. Ibaji Nagaland asoshi shisabolutsüka lir. Aji oda, Naga yimten tebilemtsü kokteta ken o tatem kati arutsü melen Naga yimten nüchiso tenüng nung Naga nunger telok paikaya tentetyonga aoba yagi Naga nungertem asoshi yimten nüchiso bushir telok koba-ar mejangjateti kümogo. Iba ama tensa ya mazüokteti odaktsü nungbo, Nagaland state government yabo mali den kasa kümadoktsü aser Nagaland ya Naga nunger telok telok lemsar saru sarua alitsü asoshi raktepa raraba tesem-ang ka kümadoktsü. Iba ama mapang tamajung kati asenok menepa marudang, asenok Aotsür Aortemi danga Nagaland government office nung mapang shitak amshia mapa shitak inyakba akhi sobaliba tajung to shia arua benshtsü tenzüklasang, Nagaland-a mapa aisü nung topur junga shia arula ta bilemer. Kasaji, Naga yimten tebilemtsü ken o tatembang kati yaktasa arutetsüsa asen kini anir Naga nunger kintem den shisalemsatetp tenzüklasang, iba jagi tarutsü nung ajurutsüba tamangu lendong aser maksü aika nungi Naga nunger kümzükla ta bilemer. Tanübo Nagaland government nunga tuluba nungi shir tilatiba tashi agi Nagaland asoshi masü saka pei ajungtsü asoshi inyaker amai inyaker. Iba jagi Nagaland topur majungba akümer aser Nagaland nungbo saru meshiba agi kecha inyak majung kümogo. Iba ama nübortem mulung anisüngzüka melitetba tensa tia ya süngjemdaksütsüsa asen kin longjemer, Naga nunger inti ajungtsü atema ola ka agütsütet nungbo, yashi dang masü saka tanüa asenoksa samanir süla. Atangji, iba olaji aseni mulungba ola masü Tsüngremi agütsüba ola asütsüsa, asenoki, ano khen, Tsüngrem taochi bushia meyiptsü kanga nungdaka kümogo.

OLEMSABANG

Ao Rijui Achaayanga agiba “Kaket Zülur Shisamolu”,

Rongchii 26, 2025

Onük: Ao Oshi Tamentakdak aser Lirumedem.

~ **Tejembir : Mr. I. Temjen Tzüdi**

Okila:Oshi tetezü nübur tsüngda koba yimya agi südir süaka angatettepba dangji **“oshi”** ta ajar ((Narongjaker=Sign language aser Nükpoker=Braille, ano item dak alaka temang arakzüba agia jembiba lir ta ashitsü akok). Jungjunga asadanga ora, oshi ya meimchir tsüngda angatettepa alitsü atema Tsüngremer angati senpet aser temoatsü. Anungji shiba mesüra shir ajanga kin ka oshi nung mangatettep aser tebenja adokdaksüdir parnokjibo Tsüngremer senpet tajung raksatsür asütsü. Oshi kaji küm ka ana nung yanglutetba mesüra puratetba ka masü, mapang agia oshi kaji renloka ainer, ano samatsü asünunga kasaji tanem tanemi mapang agia sama-a aotsü. Anungji asen Ao oshi ya tebenja makai yangluteta aotsü Aor ajak khuret asütsü merangdi.

Yimya agi, Oshi medemra nisung tsüngda pelateper, lemsateper aser yariteper. Oshi memedemra libalirutsüa tasak aser timtema lir (Tat. tetsü kati pei jabaso nem lai angatetba oshi ashir dang agidaktsünür), Oshi nung tashi aser akhüm lir. Asenok ajak tia majung Ao oshi zülumen langrara-a (1980s tashi) senzuka toktsü aser iba jagi tanü asenok yamai timtemteper. Tanü asenokia zülumen memedemba ya tanemi toktsüra asüng asen chirnur aser semchirtem tanü dang nungi timtem aser takoksa-a tulu ajurutsü ana nung lir. Tang onükji asen oshi nung süaka tetezüji angatettsü merangra;

“Ao oshi” ta süra Aori jembiba oshi, “tamentakdak” ta süra koba nungi tenzük/kechi nung ametadaker aru aser “lirumedem” ta süra, julangjushi khenyongi mali, meputep mali, kati züluba kasaji tangar ka jagi-a zülutetba/jembitetba ta tatsü agi onük tetezüji angatettsü akok.

Tanabuba nung, tanü sentong ya tangar lima nübur kar oshioben indang jembiteptsüba masü saka asen oshi (Ao Oshi) indang tera asadangtsü onük jagi akanger. Asenok ajaki metetba ama asen oshi ya “Tibeto-Burman” oshi rongnung dena lir. Oshi rajemertemi ashiba agi Tebit aser Burma nungertemi jembiba ojang aika asenokia jembisemer aser parnokia jembisemer.

Iba den Naga nunger kin balala aika süaka ojangosü kar kar nungbo putepa aliba angatettsü akok.

Tamburi ashiba agi Zürepkong, Lungso putu nung alidang item nübur jagi süngjak nung noksa ayak tapu balala yanglua amshiba otsü lir, koba dang parnoki “Ngupi” ta aja. Saka parnoki itemji mesamatsüsa züngzünga zülua rizünga metoktsü, ibajagi item süngjak noksa aser ayakji aika samaatok südi ta bilemer. Ano asen tütsüteboutem Jungliyimtikong nung alidanga zulu balaka zülua amshiba züluyu kecha nunga akaba tang tashi nung mejangjar, saka mangkotepsü aser tsüngkotepsü amala nung noksa tapu balala amshibatem aser nisung temang nung teptsü atepba ya par mapangbo zulu küptok amai amshiogo ta tanü aseni bilemtsü/agitsü akok.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Norwich nung GNfE volunteers-i Laishiba aika lema agütsü



May 14, 2025: April ita tatembanglen Norwich tesem balala nung Good News for Everyone (taoba mapang Gideons) tenüing nung team 8-i hotels, care homes aser funeral directors ajurua Laishiba aser Khristan kakettem aika lema agütsüogo.

Norwich aser temeket nung tesem 124 nung Laishiba 544 lema agütsü. 'Scripture Focus' sentong nungji Arogo 12 nungi nisung 20-i shilem agi. Parnok rongnung Cambridge nungi Jane aser Geoff Mann na, Good News for Everyone nungi Director 5 aser Essex nungi nisung asem densema liasü.

Norwich Branch chair, Claire Gunn-i nübo tenla agütsürtem aser Gateway Vineyard The Chapel dang pelaba lemsatep.

Laisa, "Züngsem trok dang aliba ozü branch atema iba mapa ya tasak liasü saka Arogotem aser temelungertemi yariba ajanga iba sentong takok nguogo," ta metetdaksü.

Lema agütsüba Laishibatem rongnung Laishiba rangben, Tasen Lai aser Hope Magazines liasü. Hope Magazines nungi Tenüingsang Ken 20 aser osangtajung kaket Yohan lir.

Taoba mapang Gideons ta ajaba Good News for Everyone (GNfE)-i mapang shia hospitals, jails, schools, hotels, care homes aser funeral directors nem Laishiba angati agütsür. Parnok indang branch ji Norwich, Norfolk North, Fenland aser Lowestoft nung lir.

April 24 nikongdang The Way Church, Drayton nung sentong ka ayongzüka liasü aser

iba sentong nungji GNfE-i linük nung dang masü alima tesem balala nung inyakba mapatem metetdaksü.

Iba sentong nungji Jane Mann-i ShareWord Global 'GO' nung lai shilem agiba lemsatep aser Claire-i Norwich Branch-i inyaka aruba mapatem lemsatep.

Jane Mann-i, "Good News for Everyone indang volunteer ka ket nung tangar nem agütsütsü atema mapang ajak nung yangkhu nung Tasen Lai kabosa alitsüla. Volunteers-i kanga nendaka inyakba ngua ni pelar," ta ashi.

Iba sentong nungji Mark Watkins-a densema liasü. Mark den pa kinüngtsü Debra nati Samaritans Purse aser Operation Christmas Child nunga volunteers inyakogo.

Scottish Parliament-i 'suicide bill' pusemba agi Khristantem mepelar

May 14, 2025: Mongolbar aonung Scotland Parliament nung Liam McArthur-i benokba assisted suicide bill agizükba agi Khristantem aika mepelar.

Iba Bill pusema vote agütsür MSPs 70 liasü, iba bill anema vote agütsür 56 liasü aser katibo vote magütsü.

Iba bill benoksang Lib Dem MSP, Liam McArthur-i, iba ozüing agizükba ya Scotland atema putiotsü asütsü ta ashi.

Iba bill yanglushiba sülen maneni ano khen vote agütsüteptsü.

Khristan Charity telok CARE for Scotland nung tongti, Stuart Weir-i, Mongolbarnü vote

agütsütepba osang ajanga jashir aser Scotland nung matamabensartem atema jashia bilemstsür, ta ashi.

Paisa, "Assisted suicide ajanga Scotland nung soseta asüba nokdangba jenjang tamajungba akümtsü aser senti taküm karbo alima nung alitsü metemsü ta osang tai ka agütsütsü. Tanga linüktem nung 'safeguards' ajanga kecha masüba kulitem lir. Stage 3 nung Parliament nung item timtem ajakji asadangtsü imlar," ta ashi.

Paisa Scottish Parliament dang 'assisted suicide' ozüing ajanga soseta asütsü melatsü dang nungibo nisung ajak

kümzüksü aser tajungtiba anepalutsü atema dang inyaktsüla," ta ashi.

"Lenla ajaklen nungi yariba ajanga mapang talanglang shirangertem shi-mang, shisatsü aser tanela nüngdak peritsütsü," ta pai ashi.

Melungtet telok Right to Life UK nungi Catherine Robinson-i, taruba stage tem nung iba bill tamakok angutsü imlar, ta ashi.

"MSPs aikati, parnoki iba bill pusemer masü saka iba bill nung maneni o enteptsü atema dang vote agütsü ta shiogo, anungji stage 3 nungbo iba bill tamakok angutsüa akok," ta ashi.

Asia Theological Association General Assembly Taipei nung agitsü

May 14, 2025: Asia Theological Association (ATA) Triennial General Assembly August 11 nungi August 15 tashi Taoyuan, Taipei nung ayongzüka agitsü.

Taküm iba mungdang atema shimtetba omenji "Christ-Like Leadership Formation for Our Turbulent World" alitsü.

Anogo pongunü mungdang nungji plenary sessions alitsü, onük balala nung o lemteptsü, kaket ayoktsü aser tekülem

sentong agitsü.

Iba mungdang ya Khrista mesükba nung lenirtem arangshitsütsü nükjidong nung ayongzüka. Tanü putu nung mejangjaba tensa mapang ka nung tamang aser shisatsü nem lenirtem len anidaksütsü atema lenirtem arangshitsü.

Rara, lendong aser temenen kanga züinba mapang ka nung lenirtemi pei tajaba tejangja meteta lenitsüla aser Khrista mesüka tenzükba mapa

inyaktsüla.

Asia, South Pacific aser West Asia (Middle East) nung aliba linük 33 nungi ATA nung züngsema aliba Theological Institution 393 lir.

ATA ya theological institutions network ka lir aser parnoki evangelical tamang jenjang indaksütsü atema inyakba den külemi Yisu Khristai tenyaba wadang inyakba nung Arogotem nungiter.

ANOGO ABEN TSÜNGREM DEN

Khrista asen chuba

"Aser governor jagi pa dang asüngdanga ashi, Na Yihuda nunger chubaji asü?" Mathi 27: 11.

Yisu teka alener, aser tekong nung lisü pungloker notakdang chuba memesük. Pilate tasüngdangbaji tamachi tasüngdangba ama. Yisui langzü, "Au, ni chuba ka lir". Tepangkatsü telangzüba! Pa tashi kong lir. Pa chuba menden, korang, Pa ajok, Pa chuba sümok sü (royal robes) kong lir? Pa yimsüsüba shibai agizüka ali? Pilate-i menüja aser aochia reprang.

Saka tanü asenok dangi balaka adoker! Pa tang aliba aser tarutsü aliba yimli ajak, tashi ajak, aser tang aser tarutsü aliba madak tenüng ajak dang temaba tenüng agir chuba menden nung mena lir. Kotak nung chubatem madak chuba aser kiburtem madak Kibuba ta tushir. Alima ajunga nung pai yimsüsüba meteter. Kongisa pa osangtajung, temeim aser taochi jungkai adokba den aor, idakji pai amokbangba meteta pa yimli atonger. Kodang Pa Pilate matsüngdang nisung tenük agi angutsü teka alener tashi meiti noktak, Pa shitakba Kotak chuba menden nung uludaktsü. Pa yimliji tanelaren liasü: ibai ochiba yimli, temeshiba yimli, taochi, aser temeim yimli liasü. Iba anepdang nisung rongnung pa tashi maittiba liasü; saka shitakba nung Pa tashi taitiba liasü. Süra, ulubaji kechi? Tashiji kechi? Temeimji kechi? Tema nung nisungji angutsüba masü. Alima yimli ajaki Pa yimli madak apudaktsü. Pa yimliji nisung mulungjang. Pa yimli nisung tajungba yanglutsür, tamaren taküm kümdaktsür, temerük, temeshi, aser Tsüngrem tobur ajung dangi ajungketer.

Meghalaya nung Khristantem nem leper tali lemozütsütsü tuyu

Shillong, May 14 (Agencies): aser Hindu yimsü agizükertem Meghalaya nung High Court-i tasü mang rongdokba dak state sorkar dang state nung sendakba nung mangatettep Khristantem atema leper tali aliba ken o angadanga mapang lemozütsütsü atema nung High Court bench-i inyaksangshiba report agüjang, Khristantem atema-a inyaksangshitsü tuyu.

Chief Justice IP Mukerji aser Justice W Diengdoh nati akümba bench-i state sorkar dang, tang state nung Khristantem atema leper peria lir asü mesüra leper tali lemozütsütsü atema tebilemba ali asü? ta asüngdang.

Khasi aser Jaintia nungertem metetdaksü.

Khristan film 'I Can Only Imagine 2' sangküm sayatsü

May 14, 2025: 2018 küm Ventimiglia, Arielle Kebbel, Khristan film 'I Can Only Joshua Bassett, Sophie Skelton Imagine' kanga takok anguba aser Sammy Dell nungeri tongti sülen "I Can Only Imagine 2," shilem agir. Film tasenba nunga film tasenba sangküm February Trace Adkins aser Dennis 20 nü sayatsü, ta Lionsgate & Quaid na densema lir.

Kingdom Story Company-i Iba film director anaji Andrew metetdaksü. Erwin aser Brent McCorkle na lir aser Producers ji Kevin Downes, Andrew Erwin, Cindy Bond, Bart Millard, Daryl Finley) taküm otsü nung Lefever aser Joshua Walsh ajemdaker yangluba film lir. Iba nunger lir. 2018 küm sayaba "I film ya Nashville, Tennessee Can Only Imagine" film ajanga nung tangokdar. linük nung sen dollar million 83 Kasa film nung Milo aazükteta liasü.

AO OSHI ANGAZÜKDAK:**TANÜ ANGAZÜKTSÜBA OJANG****Temsü****(adj)** tapet, teindang, agitsü junger (worthy)

* Lanir shimdang nisungbaji temsü asü metemsü ta jembiteper.

Temtak**(v)** azük temalen nungi aludang tom nung anenba (get stuck while falling)

* Nisung ka süngdong nungi tsükdang süngdong terong nung temtak.



Tir Yimyim

OLONG PAITEP # 7151

1						2				3
								4		
5		6				7				
8										9
								10		
				11		12				
		13								
14						15				
				16						

TIPIEN

1. Ojembitsü tashi - 8
5. Süngjang tapu ka - 5
7. Tekanük nung enokba - 5
8. Teka amtep - 5
12. Tzüc asendak - 5
14. Tsünpang tema aliba - 5
15. Ken atenba yimya - 5
16. Asangur - 8

LANGTSÜNGLEN

1. Tepok telung nung shilem ka - 7
2. Tamajung aküm - 5
3. Chi den külemi achiba - 3
4. Meimchir alimai aruba - 3
6. Laishiba nung ayong ka - 4
9. Tarutsü nükla - 7
10. Tamendakdak/Nükjidong - 4
11. Tenük-telen mejungi aküm - 5
13. Terok nungi adokba - 3
14. Meimchir telemsa - 3

OLONG PAITEP # 7150 TELANGZÜBA**TIPIEN :**

1. Taa, 3. Teküm, 6. Aibelen,
7. Aut, 9. Ajizük, 10. Ojala,
1. Semer, 13. Sen, 15. Kioktsü,
17. Itsük, 18. Kar.

LANGTSÜNGLEN :

1. Tai, 2. Asensor, 3. Tanü,
4. Kua, 5. Mitsüktsü,
6. Azübenshi, 8. Lah,
9. Jangkok, 12. Akok,
14. Nashi, 16. Sür.

NAI-A YA METETTER MA

March 9, 2025 nü Chennai, Tamil Nadu nung tetsür telok kati Guinness World Records ka yangluteta liasü aser iba ya "largest display of crochet squares" lir. Mother India's Crochet Queens-i crochet 100,581 pieces mechi aser iba ajanga 'special message' ka sayu.

Guwahati nung GNB Road Flyover atema süngdongtem belener**Guwahati, May 14, 2025**

(Agencies): Assam Public Works Department (PWD)-i GNB Road flyover yanglutsü atema iba temeket nungi süngdongtem belenba mapa tenzükogo.

PWD-i Ambari nung aliba Assam Textile Institute premises nungi tenzuka süngdongtem belener.

Department-i akokba tashi süngdong aika belener saka kwika belentsü ano meshiteter ta PWD ketdangsürtemi ashi.

"Assam Textile Institute nung

onoki iba mapa tenzükogo aser tanga süngdongtem belentsü sentong lir. Iba temeket nungi süngdong 30 nungi 35 shi belentsü akok" ta parnoki ashi.

Iba mapa shitak inyaktsü atema PWD-i private firm ka nungi specialist ka anir arua tree transplantation maparen inyaker.

Assam Textile Institute-ia parnok campus nung drainage maparen inyaktsü atema süngdong aika agienogo aser campus tesülen atemtsü sentong lir.

Tesüiba nung State Forest

Department-ia Guwahati bypass six-lane project nung iba mapa inyaka liasü.

Süngdong 50 shi belenba nungi 40% shi masü lir. Süngdong 10 nem post-transplant treatment agütsü aser süngdong 6 junga dang lir ta Forest Department ketdangsür kati ashi.

5,053 metre talang GNB Road flyover ajanga Dighalipukhuri nungi Noonmati FCI sendakteptsü aser iba apu ya Rs 852.68 crore endoka yanglutsü.

Meitei nunger Kuki lushii marutsü metetdaksür**Imphal, May 14, 2025**

(Agencies): Kuki Zo Village Volunteers-Eastern Zone (KZVV-EZ)-i Manipur kübok Kuki yimtsüngtem mesüra lushii nung Meitei nunger shinga tetsüng majemoktsü metetdaksüogo.

Iba tenokdangba nung May 20 nungi 24, 2025 tashi Ukhrul district nung Siroi Lily Festival densema lir.

Imphal nungi Ukhrul tashi lenmang nung Kuki yimtsüng ishika lir.

"Kuki nunger atema

administrative arrangement balaka metenzük tashi Meitei nungeri Kuki nunger lushii marutsüla" ta Information and publicity wing Eastern Zone-KZVV-i metetdaksü.

Iba tetuyuba alema senzürtemji asaa senzürtem ta züingshitsu aser kechi atalokdir parnoki tebilemstü khuret abentsü, ta Eastern Zone-KZVV-isa ashi.

Tangkul Naga nungeria iba tebilemba angatettsü aser akhümtsübuttsü imlar ta parnokisa shisem.

Iba benjungmung lapokba sentong ya Shirui Village nung amungtsü, Bakshi Ground nung nüngtugu ShiRock alitsü aser Ukhrul Headquarters nung cultural cum closing ceremony alitsü.

Manipur sorkari Shirui Lily Festival 2025 atema Rs. 6.30 Crores lezmüksüogo aser iba ya kanga manguba Lily species nguteter küm 75 ajungba benjungmung asütsü.

Manipur sorkarisa Imphal nungi Ukhrul tashi transport arrangements anepaluogo.

RIMS nung Meghalaya nursing student ka soset**Imphal, May 14, 2025**

(Agencies): Meghalaya nungi arishi küm 21 tain nursing student ka la indang hostel takdang nung soseter aliba angu.

Iba ya Regional Institute of Medical Sciences (RIMS), Imphal nung atalok.

Nursing student ya Abiel Sachiana Ch Marak ta jangjaogo aser la ya fourth-semester B.Sc. Nursing student ka liasü. La ya

West Garo Hills, Tura District nungi liasü.

Class nung routine morning roll call alidang Abiel Sachiana maliba ajanga külem kaketshirtemi la takdangi la bushia ao. Idangji la nungi telangzüba kecha maliasü aser takdang telungi aidang la soseter aliba angu. Iba jagi RIMS administration-i ketdangsürtem nem osang sangoktsü.

Lamphel Police Station nungi telok ka den Manipur Forensic Sciences Department nübotem tesem tonga arua bushisüngdang tenzük.

La indang mang RIMS morgue nung post-mortem examination atema bener ogo.

La ya soseta asüba ama ajiteter saka autopsy agiba sülen ang osang tejangja metetdaksü ta police-i ashi.



Assam State School Education Board (ASSEB)-i tan academic year nung Higher Secondary level nung elective subjects tasen asem Artificial Intelligence (AI), Financial Literacy, aser Sign Language tenzüksü ta Assam Education Minister Ranoj Pegu-i metetdaksüogo. Bodbarnü IIT Guwahati nung school tesayurtem Artificial Intelligence indang anogo asemnü residential training program tenzüksüdang pai iba osang sangoktsü aser school nung curriculum material ama amshitsü atema AI textbook ka sayatsü.

Israel-i northern Gaza amak, nisung 48 shi tepset

Gaza City, Monupii/May 14 (Agencies): Israel-i yasüng tayimtsü amshia northern Gaza amakdang Palestine nunger 48 tepsetogo, ta mozüki osang ka ajanga ashi.

Jabalia jila nung nisung aliba ki aika aser refugee camp ka nung amakba sülen asürtem rongnung tanur 22 aser tetsür 15 densema liasü, ta Indonesian hospital ajanga ashi. Online nung video ka lemsatepba nunga nisung ter dak tema tasü mang ali nung aliba nguogo.

Israel mitkar temi report tem reprangshimba mapang lir ta ashi. Palestine nunger rockets khaloktsüba sülen parnoki Jabalia aser temeket nung alirtem dang Mongulbar aonung ainshitsü shia liasü.

UN indang humanitarian affairs tekolakbai UN Security Council züngsemtem dang Gaza nung "genocide" nokdangtsü atema mapa inyaktsü ajungshiba mapang iba osang ya angazüker.

Mongulbarnü New York nung senden ka nung jembidang, Israel-i asaa aser maaki civilian tem nisung masü ama amshir, ta Tom Fletcher-i aitsü.

Pai Israel dang hopta ter shi Gaza mokdanga aliba agientsü ayongzük aser Israel-US ajanga iba territory nung humanitarian aid lema agütsüba maparen agitsü sentong aliba aitsü.

Israel ambassador to the UN, Danny Danon-i council dang Hamas indang rara nung foreign aid ya amshir ta ashi.

Kasa mapang US Special Envoys Steve Witkoff aser Adam Boehle nati ceasefire aser pua alirtem chioktsü asoshi tezüngzüktep agitsü atema jembishinü tasen tenzüksü atema Qatar-i aotsü ta ashi.

Hamas ket nung aliba hostages 58 ya chioktsü memulunga tan hopta Gaza nung mitkar inyakyim ulushitsü ta Israel Ato Kilonser Benjamin Netanyahu-i amokmerena lir.

Mongulbarnü southern

Gaza nung aliba European hospital compound nung Israel-i tayimtsü amshia kanga sashia amakdang nisung 28 tepset, ta yangji aliba ketdangsür temi ashi.

Israel media ajanga ashiba agi parnoki Mohammed Sinwar dak tenük yoka liasü. Taoba küm October ita Israel sepaitemi pa (Mohammed Sinwar) teti Yahya tepsetba sülen pa Gaza nung aliba Hamas lenir kumogo ta amanger.

Iba mozüki telung nung command-and-control centre lapoka aliba Hamas kiralongrar dak kanga mezüng-mezünga amak, ta Israel mitkari ashi.

Hamas teloki October 7, 2023 nü arütsü alema aita nisung 1,200 shi tepseter ano nisung 251 pua bener aoba langzua iba telok samatsütsü asoshi Israel mitkari Gaza Strip ajungalen amak tenzük.

Tang tashinung Gaza nung nisung 52,908 tepsetogo, ta yangji aliba Hamas meyong health ministry ajanga ashir.

Trump-i Iran sanctions shidak inyaktsü ajungshi

Riyadh, Monupii/May 14 (Agencies): Bodhbarnü US Tir Donald Trump-i Iran nem tenokdangba agüja aliba shidak inyaktsü ajungshi aser nuclear ken o jembishinüba nung tangatetep kati arutsü imlar ta ashi.

"Ni Iran den tezüngzüktep ka yangluner. Takoktsü dang süra ni langka inyakner," ta Trump-i Riyadh nung Gulf Arab lenirtem indang senden ka nung ashi.

"Saka aji ataloktsü asoshi parnoki kiralongrar yariba anentsüla, proxy wars anentsüla, aser nuclear nok-nü bushiba maparen teti asoshi tejangja anentsüla. Ni Iran asoshi tang tesüsa sanctions benoka aliba ajunga mapa

kuma inyakba nung adentsü ni linük ajunga dang kanga ajungshir," ta pai ashi.

"Tang tesüsa" ta pai ashiba tetenzü mejangjar, saka Trump administration ajanga tawa ang Iran indang oil industry aser nuclear programme dak sendakba entities aser kija nem tenokdangba balala agüja lir.

Alima nung tashi tait linüktem aser Iran tsüngta tezüngzüktep ka yanglua aliba nungi 2018 küm Trump ainshia liasü, koba ajanga Iran nuclear inyakyim UN-i mittsü aser iba melen sanction magütsütsü shia lir.

Iba sülen pai Iran nem tenokdangba balala agütsü aser yangji Iran nunger toztü aliba linük tema merenshitsü dena lir.

Item secondary sanctions ya Iran nung indang-indanga sanctions agütsüba dang lenmang kar nung tesashiba lir, ta Trump-i ashi.

Israel mitkari Tehran indang nuclear programme nung amaktsü amokmerena aliba paidoktsü meranga Trump administration-i Iran den senden pezüben menogo.

United States aser Iran linük anaprongi senden junga menogo ta ashir, saka accord atema tejangja mejembi ama ajiteter.

Iran yagi nuclear nok-nü yanglutsü meranger masü ta ashir aser parnoki Hokulbarnü Turkey nung Britain, France aser Germany den senden amentsü imlar ta shiogo.

Brazil Tir Lula-i Putin dang Istanbul-i oa sensaksemtsü mepeshi

Beijing, Monupii/May 14 (Agencies): Brazil tir Luiz Inacio Lula da Silva-i, Russia tir Vladimir Putin dang Ukraine tir Volodymyr Zelenskyy den Turkey nung oa sensaksemtsü atema nongshitsü ta tenangzükba agütsüogo aser ashiba agi, Moscow dang sensaksem nung shilem agia küm asem rara aliba anentsü ayongzüksü ta shiogo.

Lula ya China nung regional forum ka nung shilem agiba sülen meyipa aoba mapang Russia yimtiba nung anenzüksü imlar.

"Ni Putin den jembitsü merangtsü," ta Lula-i pa mapuso tsüngda Bodhbarnü Beijing nung osangbenertem den sensaksemba mapang ashi.

"Hai, comrade Putin, na Istanbul-i oa sensaksem nung

shilem agiang ta ashitsü atema ni kecha makoksatsü," ta pai ashi.

Sensaksem ya Brehostibarnü Turkiye indang commercial hub, Istanbul nung agitsü imlar. Iba sensaksem ya 2022 küm sülen Kyiv aser Moscow na mezüngbuba indang indanga sensaksemba asütsü.

Ukraine foreign minister-i, Brazil dang Putin aser Zelenskyy na tejak o tejak na chitepa sensaksemtsü atema Russia nongshitsü mepeshiba sülen Lula-i iba olen ya lemsatepa liasü.

Brazil aser China nati Mongolbarnü külem sangdong ka ajanga, indang indanga sensaksemba ajanga dang mangatetep ya bentettetsü, ta ashi.

Zelenskyy-i, Putin dang Turkey nung ajuruteptsü ayongzükogo aser ashiba agi, pa marura iba ajanga Moscow-i yimjung atema kecha tejangraba maliba sayutsü.

Paisa, United States tir Donald Trump, shiba tang Middle East nung linüktem semdangba mapang lir, pa danga Turkey semdanga sensaksem nung shilem agitsü jaokogo. Trump-i, Istanbul nung sensaksem nung US Secretary of State Marco Rubio-i shilem agitsü ta sangdongogo.

State Department ketdangsür kati ashiba agi, Rubio ya Istanbul-i Hokolbarnü aotsü imlar.

Ajisüaka iba senden nung Putin-i shilem agitsü magitsü iba indang Kremlin-i tang tashi nung kecha osang agüja mali.

TEPELATASOBA ANOGO SALEM



Mr. B. Atu Jamir (Khar)
15.05.1935 (Küm 90)



Mrs. I. Temsüla Walling (Khar)
20.05.1937 (Küm 88)

Teti onoki meima aliba Obala küm 90 aser Ojala küm 88 ajungba anogo Teyanglur Tsüngrem nem tenüngsang aguja amonger.

Tulusang Tsüngremi tsürabur maneni anema aliba taküm den arishi talang moajangma ta onoki sarasademtsür.

~ Temeim chirnur, semchirtem
aser anükapang,

OFFICE OF THE PRINCIPAL CLARK MEMORIAL HIGHER SECONDARY SCHOOL, IMPUR

SITUATION VACANT

1. Warden (Male)
Requisite Qualification
- 1 Post For Boys Hostel
- Graduate in Arts/Science/
Commerce/Theology (B.D. or
equivalent) from a recognized
University.
- * Fooding and lodging free.
- * Date of interview - 26th May
- Interested candidates fulfilling the requisite qualification may apply with complete Bio-Data through the school mail provided, on or before 21st May 2025 addressed to Principal CMHSS, Impur. Time of interview will be intimated personally.
- Email: cmhssimpur1895@gmail.com

Sd/-
(CHUBAINLA)
Principal, CMHSS, Impur

CONFEDERATION OF ALL NAGALAND STATE SERVICE EMPLOYEES ASSOCIATION, DIMAPUR UNIT.

PRESS RELEASE

Through this press release, the undersigned would like to announce that the Confederation of All Nagaland State Service Employees Association (CANSSEA) Dimapur unit will convene a meeting on Saturday 17th May 2025, at 1 pm.

The venue for the meeting will be at Hotel Saramati, Super Market Dimapur.

The meeting would deliberate pertinent issues/ agendas including 8th ROP, CMHS, OLD PENSION SCHEME, PARTICIPATION IN THE NATIONAL STRIKE AND OTHER AGENDAS OF IMPORTANCE. CANSSEA Dimapur unit executive members and 2 (two) representatives from all the Government departments under Dimapur district are requested to attend the said meeting without fail.

Sd/-
(LANUNGBA SANGLIR)
PRESIDENT.
CANSSEA, DIMAPUR UNIT

Sd/-
(LOLANO PATTON)
GEN.SECY
CANSSEA DIMAPURUNIT.

US-i Syrian nem tenokdangba agütsür aliba agientsü

Damascus, Monupii/May 14 (Agencies): United States-i Syria nem tenokdangba agütsür aliba agintsü ta Tir Donald Trump-i sangdongba sülen Syria kübok tesem balala nung nüburtem benjungtepa liasü.

Trump-i iba osang sangdongba ya Syria indang foreign ministry-i kanga pelashishia agizükogo aser ashiba agi, iba ya Syria nunger asoshi temelenshiba mapang ka asütsü, kechiyong linük küm aika rara nung arur tang yanglushitsü merangba mapang lir.

"Item tenokdangbatem agintsüba ajanga Syria nunger tamendakdak yanglushitsü, tangar dak metaloker malitsü

aser Syria nungeri anir Syria nunger asoshi linük yanglushitsü maongka tajung agütsütsü," ta ministry-isa shisem.

Riyadh nung o jembiba mapang US tiri ashiba agi, pai Syria nem tenokdangba agütsür aliba agintsü asoshi tetuyuba agütsütsü, aser Syria nungertem terenlok asoshi maongka agütsütsü.

US-i tenokdangba agütsüba ajanga Syria ya global financial system nungi atsünginer liasü aser linük küm ter dak tema raraba mapang sorkar nem rongsenketzüng nung tenokdangba aika agütsür liasü.

(Maneni tapak 8 nung...)

Asian Championship atema wrestling coaching camp tenzükogo



NWA ketdangsürtem, Rev. Vilakiezo Yano aser wrestler tem tangokba noksa nung angur.

Kohima, Monupii/May 14 (TYO): Delhi nung May 21 nungi 26 tashi asayatsü aliba Asian Belt Wrestling Alysh Championship atema Nagaland Wrestling Association (NWA) nungi wrestler 15 India contingent Senior category nung wrestler 24 rongung densema alitsü.

Iba asayamung nung tetsür aser tebur naprongla asayatsü aser iba atema May 14 nü nungi NWA wrestlers tem IG Stadium Multipurpose Hall "B" nung coaching camp tenzükogo.

NWA Joint Secretary, Kuzhovesa Soho-i sangdong ka ajanga ashiba agi, camp ya asayartem Delhi-i mao tashi agitsü koba May 19 nü asütsü imlar.

Kasa mapang nung iba camp atema bendanga agütsü sentong tatsüka agi, kong Pastor, Angami Christian Revival Church Council (ACRCC) Mission Centre, Kohima Rev.

Vilakiezo Yano-i asayartem ajungshi aser camp aser tarutsü atema Tsüngrem temoatsü meshizüka sarasadema liasü.

Osang ajanga ashiba agi, Europe & African continent nung densema linük 30 nungi asayartem iba asayamung nung shilem agitsü imlar, kong Naga Wrestling sayutsü (introduced) imlar aser ibayongji NWA-i Naga nungertem dang state nungi wrestler tem sarasadem nung bilemtettsü mepeshia metetdaksüogo.

Item wrestlers, referee & official tem Indian Team contingent nung densema lir.

OFFICIALS

- * State President: Vivolie Kezo
- * State Secretary: Kenlum Hemang
- * Referee: Surhoneyi Soho (UWW nominated)
- * Team Director: Er. Seyielhouvi Nagi
- * Team Manager: Keneilel Kevin Rote

* Team Coaches: Vekhriyi Chüzho, Rangsilang & Mezhiesino Keyho

WRESTLERS Free Style Men

- * Lhupra Vero (60 Kg)
- * Rokuokehie Khawakhrie (70 Kg)
- * Küvenu Puro (80 Kg)
- * Hulüyi D. Vadeo (90 Kg)
- * Venuzo Dawhuo (100 Kg)
- * Rukukhoto Khushi (100+ Kg)

Free Style Women

- * Thejaneinuo Thevo (75 Kg)
- * Khrielhouuo Thevo (75+ Kg)

Classic Style Men

- * Wezutsho Venuh (60 Kg)
- * Külüvezo Soho (70 Kg)
- * Seyiejalie Gwirie (80 Kg)
- * Vevokho Ruho (90 Kg)
- * Menuosetuo Yiese (100+ Kg)

Classic Style Women

- * Haizuyile (65 Kg)
- * Vikehenuo Zumvu (75+ Kg)

NWA team ya May 19 nü Delhi-i aotsü imlar aser May 26 nü meyipa arutsü.

Asia Cup nung Pakistan shilem agitettsü magitettsü mejangja

Monupii/May 14, 2025

(Agencies): National federation tang sorkar tetuyuba ataba mapang ka lir, saka taküm India nung asayatsü aliba Asia Cup hockey asayamung nung Pakistan asayatettsü masayatettsü mejangja, kechiyong kiralongrartemi Pahalgam amakba sülen linük ana tsüngda tensa mejungi lir.

Taküm Asia Cup ya Rajgir, Bihar nung August 27 nungi September 7 tashi asayatsü. India den Pakistan, Japan, Korea, China, Malaysia, Oman aser Chinese Taipei nungeri iba asayamung 12buba nung shilem agitsü, koba taruba küm Netherlands aser Belgium na nung asayatsü aliba World Cup atema qualifying asayamung ka lir.

"Tangbo kecha shia matatettsü, saka onoki taoba mapang ama ken o dak sendakba nung sorkar tetuyuba sülen anidaktsü," ta HI secretary general Bholanath Singh-i PTI dang ashi.

"Tawa Pahalgam amakba den India-i Operation Sindoor benoka inyakba sülen tangsa tangbo kecha takzüa matatettsü.

"Asayamung asayatsü atema ita asem shi anunga lir, saka sorkari kechi shidir iba sülen anidaktsü. Iba asoshi lenmang ka dang lir," ta paisa shisem.

Pahalgam maka alima penzü 26 tepsetba sülen sorkari Pakistan nunger ajak dang India toktsür aotsü asoshi tetuyuba agütsü aser parnok indang visa meyipa agia liasü.

Iba sülen India-i 'Operation Sindoor' benoka Pakistan aser Pakistan Occupied Jammu and

Kashmir nung kiralongrartem tesep amak.

Iba sülen Pakistan-ia meyiper drone aser missile agi India maka tensa mejungi kuma liasü.

Pakistan indang Director General of Military Operations-i India den tongtepratepba sülen linük ana yagi May 10 nü ceasefire benoktsü mulungtepogo.

"Sorkari temelaba magütsüra Pakistan team India-i marutsü. Ken o ajak ya asayamung asayatsüba mapang nung sorkar tamendakdak dak keta lir," ta federation source kati ashi.

India-i arutsü atema Pakistan nem temelaba magütsüra, asayamung nung team tenet dang asayatsü mesüra team tanga ka anioaktsü atema telemtetba ya Asian Hockey Federation-i agitsü.

"Team tasen ka anioaktsü mesüra team tenet dang asayatsü, iba indang tangbo shia atatsü kanga karara. Iba dak sendakba nung Asian Hockey Federation-i telemtetba agitsü," ta ketdangsür yagi ashi.

Pakistan hockey team tatemsa India nung asayamung ka nung shilem magibaji 2016 Junior World Cup nung liasü, koba kiralongrartemi Pathankot air base amakba sülen ita ishika dang lir asaya liasü.

Iba asayamung nung Malaysia-i Pakistan melena liasü.

Asia Cup ya kanga tongtibang lir, kechiyong iba asayamung ya World Cup qualifier ka lir aser takoker taruba küm World Cup nung indang indanga asayatsü atema maongka angutsü.

All-rounder Ravindra Jadeja-i otsü tasen ka yangluogo



Monupii/May 14, 2025

(Agencies): India nunger cricket asayar Ravindra Jadeja-i alizüing tasen ka tongteta pa ya Test cricket puti otsü nung all-rounder tem rongnung No. 1 jenjang nung talangtiba aliba asayar kümogo. Pa anogo 1,151 tashi No 1 nung lir.

Nüngtugu spinner, shibai lower-order nunga batting kanga junga amener, pa maneni ICC Men's Test All-Rounder Rankings nung temaba jenjang nung lir, koba pa jakdang asayar kati danga papika yabo No 1 jenjang bendanga mali.

Jadeja maneni temaba jenjang nung aliba ya pa kanga consistency süa asayaba kuli dang masü saka condition balala nung pai kanga junga asayatetba kuli lir. Pitch tamajung ka nung kanga meranga asayar fifty yangluba mesüra asaya melenshitsüsa wicket pongu agiba süang arishi küm 36 tain asayar ya India Test team nung tongshi ka kümogo.

Temaba jenjang nung Jadeja jenjang masetshi-i lir, saka Bangladesh nunger asayar Mehidy Hasan Miraz-i kanga junga asaya-a pa jenjang

yanglushidar.

Zimbabwe den asayaba mapang run 116 yangluba den wicket 15 agia kanga junga asayaba sülen Miraz all-rounder rankings nung No 2 asayar kümogo. Pai pa indang career nung rating point tajungtiba 327 ngutetogo aser pai Jadeja point 73 agi memenepi lir.

Bangladesh-i Chattogram nung Test akokba sülen Taijul Islam aser Shadman Islam nungera jenjang junga kümogo. Batter tem rongnung England nunger asayar Joe Root maneni temaba jenjang nung lir aser bowler tem rongnung Jasprit Bumrah temaba jenjang nung lir.

Specialists temi amokbanger asayaba putu ka nung Jadeja-i batting aser bowling naprongla kanga junga asayateta modern all-rounder ka asütsüji kechi aji tanaben rasaogo aser tang pa ya test asaya nung all-rounder tem rongnung pa ajak dang asayar tajungtiba kümogo.

BENDANGLI OSANG : Tapak 7 nungi...

US-i Syrian nem tenokdangba agütsür aliba agientsü

Item tenokdangbatem ya rara tembangba sülen Syria yanglushiba mapang rongsenketzüng nung tetsükdatsü tulu ka ama züngshia aruogo.

Iba osang angazükba sülen Syrian nungertem kanga pelatep tenzük aser tebur, tetsür aser tanur aika Damascus kübok Umayyad Square nung adenshia benjungtepa liasü. Parnoki ken tema pelatepba den pei gari nung Syria wako ayipshia senzüa liasü.

"Ni kanga pelar, iba telemtetba agiba yagi linük ajunga nung temelenshi adoktsü. Kisüjensü tanaben tenzükshitsü, pei ki toktsür jenshia or alirtem meyipa arutsü aser oset jenjang

tajemba akümtsü," ta arishi küm 33 tain English oshi tesayur Huda Qassar-i ashi.

Kasa mapang nung Idlib province nunga arishi küm 39 tain Bassam al-Ahmed-i iba osang angazükba pa kanga pelaba lemsatepogo.

"Küm 14 rara aser küm 50 tashi Assads-i ajemzüka toktsüba sülen tekümzüka kübok manokshi-i alitsüji Syria nunger temeden lir," ta pai ashi.

Maneni US-i teyari agütsüba Syrian Democratic Forces lenir Mazloun Abdi, shiba dang Mazloun Kobani ta ajar, paia iba telemtetba agiba ya kanga pelashishia agizükogo aser iba ya linük yanglushiba nung amshia Syria nunger tarutsü tajungba kümdaktsütsü imlaba lemsatepogo.

BILEMDANGANG

"Mapa ka meima inyak nungdang tuluka inyaktettsü."